

四庫全書

集部

欽定四庫全書

御製樂善堂全集定本卷十九

古體詩

古風十三首

堯舜傳心學危微十六字禹湯繼其傳執中與禮義文
玉躬亶亶不已功常粹唐虞三代初大道中天麗比屋
皆可封無煩別義利詩亡春秋作風薄俗亦偽惟時王
道衰人人騁私智天生我仲尼金聲振洙泗刪詩定禮

樂堯舜功不啻一自泰山頽彌天布妖彗楊墨逞邪說
申韓建私議鄒嶧乃揚徽奮然闢險詖戰國逮嬴秦道
蝕斯文墜祖龍輕狂兒輒敢燔典志劉季提三尺儒風
豈云熾武帝始求賢董子明正誼三策醇乎醇天人理
咸備昌黎稱聞道猶未濟其蔽自漢迄宋初道昏人如
醉偉哉無極翁粹然秉道氣學不由師傳理已臻極致
二程實見知主敬標赤幟朱子集其成經天復行地緬
維千載心授受本同契絕續遞相衍斯文統緒寄午運

數恰中自協唐虞治作君無作師吉士踵相繼

東皇運洪鑪發生滋萬象卉木爭芳菲春和風淡蕩入
夏氣益舒天喬俱榮長涼飈西北來一吹天地爽洞庭
木葉落空林月色朗萬物何蕭條摧殘委草莽惟有嶺
頭松蒼顏挺百丈偉哉君子節千載令人仰

巢由避堯舜遯世心自安嚴光繼其蹤隱釣富春灘光
武曲成之高節難躋攀東漢尚名義廉立懦與頑奸雄
且顧忌千古一釣竿

比干既已死後世仰忠誠吾於三代下復得楚屈平諫
君君不聽汨羅抱孤貞詎不惜身死未忍楚祀傾今讀
離騷篇淒然傷我情

中天秋月皎四野秋風生庭梧一葉落陰蟲相和鳴鴻
鴈橫遠塞音響一何清蟬吟忽已寂又催刀尺聲物理
皆如此隨時有枯榮

鍾期既棄世伯牙不鼓琴管鮑貧時交意氣稱斷金豫
讓報智伯吞炭自成瘡知已有高下友道有古今骨化

不能泯千秋同此心

東海有瀛洲僊人居其間安期羨門子九轉成金丹自
謂得長生飛昇如羽翰倫物苟遺棄孤生亦何歡

子房報韓讐傾產不謀家去項而事劉迹如博浪沙功
成託導引豈曰棲煙霞全身更全名飄然高風遐高風
本血誠莫使毫釐差

瀛溪惟愛蓮淵明惟愛菊吾於羣卉中特愛渭川竹嚴
冬草木枯依然挺青綠扶踈繞屋栽朔風鳴寒玉直哉

君子節所守貞且篤

秦王失其鹿英雄爭逐之沛公入關中三章法令施偉
哉蕭相國策力咸會時鴻門宴諸侯端坐衮冕垂一增
不能用勇力徒爾為矧乃恣殘暴衆志均乖離用賢兼
愛民斯為王道基

煌煌諸葛公大義炳宇宙三分計先定三顧始勉就拒
曹挫其鋒和吳息戰鬪七擒孟獲降六出仲達走漢祚
竟不振星落莫能救惟公仗忠誠中心思克復雖未躋

伊呂猶在蕭曹右豈徒仰勲名宮牆輝俎豆

淵明既歸田門前種五柳心與世俗隔讀書快飲酒惟
結山水緣那復戀五斗微意殊可風亮節不掛口

同雲布層陰密雪降九霄乾坤大地間化為瓊與瑤六
龍迴日御中天光孔昭藹藹復融融積素一時消人生
秉性良胡為自刻雕理欲戰其中復被外誘搖安得如
日出陰氣無凍膠執中存道心吾聞諸唐堯

蘓卿節

羶廬夜嚙天山雪一腔血性猶然熱空教淚灑李陵襟
獨重千秋蘇武節秋草蕭蕭老茂陵幽宮路杳喚難磨
持謁荒原痛衷曲節旄落盡如髮禿

侍中衣

侍中衣慎勿浣草中天子識良佐官蠶叫罷肉糜殘此
日何能救饑餓倉皇應悔晨鷄鳴蕩陰秋色闇欖槍正
色從君却佳馬侍中浩氣今如生猶憶知幾衛伯玉撫
牀惜座傷衷曲

鄭公笏

貞觀天子能納諫黏壁封章盈便殿當時貞亮數鄭公
君臣一德堪歆羨十思纔上十漸陳仲山補衮抒忠純
祇今遺蹟傳公笏想像進奏風霜新卓哉牙笏因公貴
正直常留浩然氣立碑可仆婦可改此笏千秋只姓魏
段太尉笏

饑軍蟻雜提霜戈瓊林庫貯何其多倉皇羸馬奉天道
寶玦珊瑚可若何封帛梁楣舊相識一時北面非羽翼

幾事不密乃害成此日司農見本色氣似虹霓目似電
不擊賊身擊賊面慨慷一死重太山凜凜秋霜飛白練
公笏非石亦非銅一腔血性流其中桑田有改笏不壞
即今見笏如見公

俠烈行

俠烈復俠烈血性腸中熱能為百折鋼不為繞指鐵能
為易壞齒不為長存舌一身與一劍衆中推人傑畢命
報知己中心差自悅

秦吉了

雕籠繡柱光離離語闌芳意情淒迷空庭新綠圍四面
家在關山西復西主人憐愛比小鳳筵前艷曲曾三弄
等閒不敢學雞鳴鮫綃只恐驚春夢

藏雪

青女昨夜迴鸞車忽遺徧地瓊瑤屑朝來愛日正三竿
霽景更與尋常別蝶夢初醒扶短筇踏破瑤京屐齒裂
却觀秃兀玉山頽更愛長林素蕊纔纈課童藏雪聊復爾

大瓶小盞分行列隨圓掬起古鏡冷因方裁破瑑圭圻
映目晶英心似冰渴腸未沃寒生舌比之滿貯甕頭春
自謂此舉猶非拙古香仙露沁詩脾高齋清供天然設
何須雜沓爭後先霽後晨寒市踪絕

烹雪用前韻

瓷甌淪淨羞琉璃石鐺敲火然松屑明窓有客欲澆書
文武火候先分別甕中採取碧瑤瑛圓鏡分光忽如裂
瑩徹不減玉壺冰紛零有似瓊華纈駐春纔入魚眼起

建城名品盤中列雷後雨前渾脆軟小團又惜雙鸞坼
獨有普洱號剛堅清標未足誇雀舌點成一椀金莖露
品泉陸羽應慚拙寒香沃心俗慮蠲蜀箋端研几間設
興來走筆一哦詩韵叶冰霜倍清絕

冬夜聞空鐘

空鐘者以竹木為之繫於鵠尾鵠飛空中則衝
風而鳴泠泠然如清夜霜鐘信可聽也

屋門下重簾歸鴉寒不起朔風戶外飄霜天淨如洗我

時聊復閒吟弄虛齊裏何來空鐘音喚醒敲詩耳徘徊
雲霄中清越難為比乍如焦尾琴調自伯牙指又如寒
蟬聲咽露曉且美春容招提煙清冷三峽水耐冷不能
翔飛鳴殊未已鵲鴿爾何勞歸鴉已安只一勞而一逸
為君評其旨野鴉不受羈動息由於已鵲鴿戀蓂養由
人而已矣束縛其羽毛玩弄憑童子傍晚放之飛達旦
何能止嗟哉天地間何事不如此

射雉行

麥塍臯月浪花長雉母呼雛翠隄上雛兒襁褓纔學飛
翅弱母心愁惘惘少年初挾燕角弓芳畦緩步薰風中
雛飛不似雉飛疾箭翻繡羽飄腥紅歸來日暮心中喜
不憐老雉傷心死

學僊謠

東東叩齒鳴天鼓希夷內景昇瓊戶蓮臺坐嬰閉三蟲
僊名已入玉清府海塵漸起蓬萊山瀛洲方丈飄渺間
淮南雞犬不易及碧落龍髯那許攀始嘆平生空費力

家鄉欲歸歸不得

向火

人生貧富殊畏寒情無二暖閣下重簾獸炭鑪中熾豈
無輕裘暖向火時坐地芳馥水沉銷聯翩蠟珠墜春融
丈室間清供良具備是時萬籟收徒倚猶未睡忽聞街
市聲寒宵風送至勞逸乃爾異伊人亦我類苦耐霜飈
冷為覓錐刀利祁寒而怨咨聞之周書紀所幸陽旋復
春和歸次第貞者元之基成者君之賜况復雪新晴豐

年已告瑞

寒月

寒月上窓夜方內歸鴉棲穩松梢影篆煙一炷裊沉檀
靜坐高齋聽漏水年來頗得三餘樂妙趣當前默自領
何用文牀卧翠衾正是幽人蝶夢醒

過曲澗花香遊流杯亭日知閣諸勝

西苑曠且奧肇自明代作瓊華萬玉堆太液千夫鑿平
地起蓬瀛城市而林壑松篁幾百年參天秀崖壑秋深

鴻鴈鳴春暖桃李灼肅廟求神仙林亭更開拓方士朝
扶鸞虛皇夜飛鶴丞相冠蓮花將軍赤符縛雞犬脩已
昇殿宇還如昨

盛朝建邦畿舊制因城郭何獨廢西苑姑亦存其畧高
居非昔比偶幸行宮若雍正二年夏承

恩開講幕避暑供遊息勝迹頻探索湛湛芳草青潏潏
游魚躍蔥蔥梧桐枝爛爛蓮花萼或宴水雲榭佳景開
芳酌或賦迎薰亭妙句隨興落師友得從容昆弟善笑

謹是秋獵塞北奇峯峭天削回思此間山宛似日出爝
因緣不復至撫景懷佳約時過玉蝀橋波光含漠漠煙
際辨樓臺松竹紛竿簫彈指十年間何異風鳴鐸前日
重來遊未能窮其樂遙矚淑清苑凍岸不可泊今朝好
風景遲日中天爚步自瀛臺橋踏冰行蹻蹻乾蘆尋曲
徑虛殿開金鑰穿雲洞戶深步石川梁迺乃知洞裏天
自與尋常各冬深景寂寞翠剌琅玕籜閒坐流杯亭更
登日知閣會心濠濮間呼朋嗒然嘑其北乃假山巉巖

何磊砢攀援徑絕處深澗戲騰踔時我徑過之我童猶
畏却其上掛瀑布結構儼廬霍飛沫雜水流玉牙排斷
喙其池乃不凍疑有馮夷託當年觀魚亭塵土生珠箔
歸鞍適然返聊爾何住着我聞山水緣好者不為惡何
必買山錢底須蠟芒屨前居水中萍茲遊林裏雀異日
得清暇還教度略約

充隱

小隱隱山林大隱隱朝市如何末世人充隱稱君子安

車假徵求賂資囑莫起盛朝有遺賢乃是皇甫氏清流
本皎潔吐哉濫於此

秋夜遣興

春華復秋實來往運橐籥世人於其間憂喜隨時作歡
賞樂青陽金天嘆蕭索但知逐境流觸處成執着何人
能解懸便是希夷樂皎如秋月心大哉天地幕

夜坐

夜坐悠然欣自得地鑪火煖燈花直年來詩興富冬宵

清吟消得銅壺刻，朔吹生寒雪灑天。
窗前梅蕊饒顏色，因思勞勞市上人。
半身僵凍還謀食，有時西北來涼颼。
邊陲天末頻相憶，勞逸憂娛頓殊慚。
愧吾廬獨宴息，九臯生去不生歸。
戴九臯以七年出征十年輦骨而返
前年夢見傷心極，天心仁愛應洗兵。
旋看明年太平賊軍營，十萬壯男兒各各歸家勤稼穡。

憶遠

銀燭垂金英夜長，人未睡重簾下攲。
揄邈然動遐思，邊

陸萬里遙故人勤王事雪花大如拳朔風勁如刺虎帳
不禁寒征衣遠難寄我輩擁重裘宴然讀書次况復歲
華近團圞一家萃何當息烽燧凱旋歌飲至遐邇共歡
娛仰首望天賜

綠珠

學舞按歌足靈慧翠鈿珠落烏雲髻筵前擊碎紫珊瑚
盈盈弱質天教麗傾城未得却傾家石侯東市堪咨嗟
高樓一夕恨惆悵玉樹朝來惜落花此時樓廢無消息

野草還作傷心色

題二十一叔父山靜日長小景

吾叔乃詩翁裁句清而好近復叅畫禪頗得畫中道高
齋長日暇為我濡毫掃即景繪為圖筆法特高老一峯
挿天青波面池亭小峯腰瀑布飛亭畔清流繞更無別
粧點寫意殊了了我聞詩兼畫妙品古來少摩詰真蹟
無元鎮清風渺吾叔乃升堂況值青年早從知天授奇
不憑人力巧嗟我學畫法年來曾探討高山但景仰與

洽林泉杳

鶴媒歌

童子開籠放鶴媒音長翅短清池隈上有野鶴翩然來
青莎顧步相徘徊主人喜得新鶴易剪羽還將稻粱餵
鶴媒有聲不能語長叫寥天韻淒楚但願聞聲鶴莫來
却得高飛不籠汝

雉媒歌

平岡草淺雉媒叫遊絲飛絮紛斜照野雉歸飛帶夕暉

迴視雉媒如相召翻同飲啄不加防上下鼓翅爭翱翔
雉媒引雉入羅網弋師歡喜媒徜徉嗚呼同類且如此
機詐相傾殊未已雉媒欲報稻粱恩莫辭自赴烹調裏

馮媼好

上林虎圈雙門開奔熊正對官家來弱支膽敵千夫勇
當前直立驚同儕同儕驚上心喜始識媼好真愛已得
寵不如失寵安懼心纔定妬心起君不見呼天誰白中
山冤致使人傳大內言

神僊曲

飄飄羽佩凌天風雲裾娑娑曳綵虹西池阿母煩守宮
夢中幾過桃花紅下視蓬萊塵欲起吹來鐵笛蘭煙紫
鬱羅蕭臺空劫中驂鸞謁帝雲霄裏却去竹山穿石窟
泉底今朝葬仙骨

海市

蜃氣遙浮滄海東離離曉現蓬萊宮璇題銀榜幻空影
重樓掩映扶桑紅鮫綃驪珠燦光澤市與麻姑飾瑤席

坐令人間眼界新
煙雲萬頃連天碧
君不見方士迴舟
阻風水僊踪大抵皆如此

覺生寺大鐘

洪鐘二丈高其圍乃數倍
隆棟繫旋蟲含光耀精彩摩
挲古質想前朝精鑄表裏龍
蛇高標題歲月去如海空
餘鉅響振雲霄即今猶眩俗
人眼那論曾傾萬家產道
場水月幻莊嚴此語吾聞諸
內典層樓重建梵王家彷彿
諸天散雨花一聲擊撞獅子
吼沙界同音演法華

鐘

上有全部法華經文

題晉戴逵剡山圖

山川靈秀稱江南伊人小隱為結庵竹籬茅舍頗自適
雲容水態曾相諳老松落落蟠翠色高峯矗矗烘朝嵐
興來掃筆作長幅故知邱壑性所耽三徑雖開人跡絕
先生杖策獨幽探何須絕琴誇逸致個中妙趣誰能參
恭瞻萬壑松風圖感而有作

老松經萬年幽壑紛千派蜿蜒掃黛眉虬龍結青蓋耳

際無餘聲颯沓泛天籟奔騰鐵騎遙見捲旗旆神韻
動諸天妙意殊堪會大哉造化功金泉創仙界高堂臨
萬壑一瀉松風快當年諸孫行惟我承

恩最

賜居亭畔室虬枝森一帶盛夏如秋深日夕靜相對謾
謾吹衣襟谷神守清泰轉瞬成昔遊感企瞻圖畫

行宮遣興

春風布始和昭蘇百卉萌靄靄景物佳曙鳥相和鳴砌

畔抽新草綠意含生生何幸承

思來南苑薄言行芳郊未合圍朝暎映檐楹隨境可怡
悅吾誰與繫情欲開有山桃未語彼黃鶯借問造化者
何復殊枯榮

雨中舟歸

夕陽西下春雲布霏霏細雨迷蹊路中流雙槳盪歸舟
十里橫煙暗村樹岸柳冥濛待暮鴉寥天低黯催孤鶩
咫尺玻璃太液池幻作寒江煙雨渡

放鯉

修鯉揚朱鬣雙雙卧筠簾失波受困縛吐沫心難堪有
人持贈我將以佐旨甘劇憐苦涸轍猶可潛深潭春風
漾水紋新藻綠氍氍撥刺彼遊魚各各生意含呼童攜
鯉至放之小池南赴波漸旋泳倏逝如脫銜我非好清
況不為口腹饞今春放雙鯉明春百倍添寄語饕餮者
放生乃大貪


舟行

御湖三月春水生微風不動玻璃平樓臺咫尺方壺聳
楊柳千條煙靄橫蘭舟容與盪雙槳飄飄渾似坐玉京
緋桃綠李夾兩岸綰綺錯繡春色并我思去夏泛太液
荷香十里疑蓬瀛即今光景正明媚綠波搖漾鷗鳬輕
等是舟行別今去年華荏苒何須驚

折芳圖

烏雲蘭馥翠未整阿香燒水簾櫳靜曉寒初試五銖衣
庭欄小立胭脂冷笑折芳枝佐玳鈿露凝粉氣猶鮮鮮

歸來徙倚香奩側
膽瓶謾挿憐清妍
對鏡簪花長太息
年年不改枝頭色



御製樂善堂全集定本卷十九

欽定四庫全書

集部

御製樂善堂全集定本卷

二十至
二十二

臣 永瑤 恭 校

侍讀臣孫球覆勘

覆校官中書臣田尹衡

校對官助教臣胡子襄

謄錄舉人臣李椿

欽定四庫全書

御製樂善堂全集定本卷二十

古體詩

夜雨齋中焚香

虛齋坐清夜斗室如方丈容膝且自安忘機心宇曠忽
驚灑窻雨因風送微響喚醒吟詩耳焚香助清賞細細
沉檀煙篆絲裊直上簾垂避輕寒靜聽萬象更深香
影殘夢與蝴蝶往此中樂趣多戶外非所想

雨中聞鴈

蕭蕭夜雨飄風鳴新寒料峭著體輕空中鴻鴈三兩橫
音徹虛齋淒以清上苑景物爭明媚倏爾變作三秋聲
蘆荻蒼茫漫含思瀟湘煙雨空復情沙暖鴛鴦遠浦淨
明朝從看春光榮

種松

園中足桃李錦繡爭春容一朝朔風撼寂寞芳條空欲
儲歲寒景當春乃種松抽枝始落落含氣方濛濛風雨

小亭側乍見出窟龍漫言少丰韵莫嗤乏丹紅君子苟
相顧勁節在三冬

暮春曲

暖雲晴日烘春老殘紅埋逕消芳早綠楊十里暗朝煙
得得催晨鶯語巧荏苒風光已似奔輕寒料峭金猊溫
抽毫為寫留春句時向窻前惜曉暎天津暖漲明如鏡
指日應看芰荷盛

西海捕魚

平湖蕩漾春波長萬頃玻璃映日朗
唼浪修鱗水面遊
爭駕扁舟盪雙槳漁人那曉生意多
不捨鯢鮪盡收網
網罟紛絕流時作求魚想嗤彼貪利人
吾寧號清賞勸
君解網放羣魚篙撐綠水中流響
花片飛香幾處漂宿
鷗眠起冲雲上刺刺新蒲欲出波
遠岬煙光含莽蒼樂
哉此遊逸興多鱣鮪洋洋任觸榜
殘照西山返棹歸別
舟笑我成空往

採芝詞自題照

何來瀟灑清都客逍遙為愛雲烟碧筠籃滿貯仙巖芝
芒鞋不踏塵寰跡人世蓬萊鏡裏天霞巾彷彿南華仙
誰識當年真面貌圖入生綃屬偶然

縛雞行

縛雞莫縛牝留以蕃孳生縛雞莫縛牡留報長短更牝
牡皆有用金鼎將誰烹君看羣雛長頗足供馘羹口腹
恣饕餮所欲難滿盈何如留有餘長以佐生成

春蠶食葉聲

吳天三月春光蕩吳蠶三眠蠶更長陌上新桑葉葉抽
晴窗鎮日風雨響喚起深閨未畫眉携筐急就飼朝饑
流水潺潺箔間落與籟瑟瑟簾前吹日長莫厭耳根閑
蠶飽絲多足相報但願今年官絹輸却免門前租吏到

秧馬

清和四月新秧綠一壠分來千壠足桐馬平馳碧浪輕
鬃鬣森森稻苗東北人使馬南人船兩蹄踏破橫塘煙
畦東畦西來往速插罷儂家幾頃田戟戟青針波欲沒

載驅終日何曾歇草壁高懸睡老農好與吳牛同喘月

聞蛙

竹影搖夕涼清光入窻牖霜簟含風漪丈室周旋久抱
枝蟬噪寂蛙鼓羣如吼昆蟲各任時日月雙丸走一徑
繞溪行叢葦蓋數畝千百沸成羣嚙啖不住口我聞雷
鳴夏汝蛙功何有徒供小兒輩垂釣出淵藪轉眼墮笭
簞因鳴受災咎九夏能幾時胡不以默守

五日芒種

南風薰薰麥苗綠稻鍼出水如新浴五日天中節物佳
却逢芒種農功促平湖潏潏欲生煙角黍蒲尊雜管絃
老農炙背溪田裏那得閒從競渡船暮歸偶自街頭走
買得靈符貼門首但願神貺沛曼陀指日西成看大有

銷夏

銷夏憑何事清吟興欲催心閒日晷永綺思方悠哉天
際涼颼動檻外山花開倏看明月上入我戶牖來即境
自怡悅拈韻無安排何須逐曉涼步屨登高臺詩成哦

幾過清夜閒徘徊此樂足銷夏非云誇別裁

花石綱

江南花石新編綱舳艫銜尾達汴梁延福五位爭工巧
地狹更廓皇城牆深壑巔巖極險邃難妨馳突燕山騎
徽廟精思百藝能如何獨昧經邦智

野田行

驅車古城道寒煙濕秋草歌倒繚牆垣悲風白楊老白
楊樹下誰家園苔迷碑字棘生門年年墓道無人掃空

餘麟卧石虎蹲生時富貴誇得意不惜萬金營幽隧叨
榮已結上公儀殊恩更賜東園器熏人勢燄今安在百
年事業歸桑海老松秃兀祇餘根子孫劖倒旁人買

姑息行

君不見明皇開邊用邊將祿山東鉞臨牙帳又不見代
宗無智用承瓘三郡河北幕府開子嗣弟及殊未已自
此朝廷事端起德宗為政事姑息封拜無能振披靡瓊
林大盈牐庫新涇原兵至玉石焚由來悖入亦悖出坐

看宮闕生埃塵嗚呼姑息真無濟令人却憶貞觀世

夜卧聽雨憶平郡王

朱明屆候天方永如烘暑氣焦塵境座間揮扇手欲疲
林下乘風吹不冷今朝一雨洗煩囂入夜濛濛萬緣靜
楊柳陰中罷暮蟬梧桐枝上收清影時有匡牀高卧人
一杯芳潤澆苦茗夜涼霜簟好安眠芭蕉響滴殘夢醒
醒後悠悠動遠思思在龍堆連雪嶺如心居士在軍營
年來王事勞馳騁即此清涼夜雨秋行帳殘燈懸耿耿

天心仁愛當偃師坐看絕塞狼煙靖百萬健兒歸故鄉
淨洗兵戈只俄頃猶憶去年煙雨中綠簑共泛滄波艇
清宵蝶夢亦偶然人生何必嘆浮梗借有好風吹送詩
知君應在三秋領

伐棗歌

老翁持斧林中過伐取供人輪與軻我遊棗林惜生意
謂翁計拙如之何輪菌枝茂葉婆娑結實應比尋常多
年年秋成但賣棗管足朝餐與晚醪何忍急取目前利

坐令大樹投斧柯老翁揖謝言難采
低價還愁人不買
縱令留樹計久長只今枵腹誰能待

郭河陽關山積雪圖

層巒積翠數千里磴道盤空連玉壘
鈴馱風霜得得行
長途跋涉間關裏世人馳利未肯休
風卷紅塵撲馬頭
河陽一幅炎涼景不徒妙筆誇風流

探雀兒

小雀出卵纔數日老雀將雛雛六七
兒
童縛木作高梯

巡檐探得雛兒出雛兒無知不憶母老雀殷勤抱辛苦
翻翻羽翼未長成嗟汝何時離哺乳

梭拂子

驅蠅梭拂子絳絲縷縷垂如何有用物壁間閒置之高
堂珠箔圍四面冰盤清暑神安怡座中恍似蓬萊島蒼
蠅卻避將安施亦如太平羣蠶息海宇不用驅除為我
願梭拂長如此莫資談柄頻頻揮

豐碑行

夕陽返照輝道周驅車古路西風秋路旁豐碑何其稠
森森挿笏盤龍虬誰能細考姓氏留但聞土民說所由
明代貂璫威福擅司禮還兼御馬圈秉筆曾標封事題
內操更教昆明戰沒後養子不掃墳羣埋此地多無算
當時威猷劇熏人只今草掩流螢亂我聞此語識興亡
秦漢唐宋皆殷監私暱何曾念履霜竊權頓令愁飛霞
勒石猶誇爵里高千年青史誰能逃辛勤汗馬創業勞
大半拋擲由若曹

遣興

數日忽成月數月忽成年年月何曾異秋枯復春妍而
人於其中胡為感變遷浩浩東海水舊時為桑田清風
拂我面明月照我前馥郁菱荷香澹蕩楊柳煙即境自
怡悅饑餐困便眠

薰風送蘭香清芬透紗牖烈烈夏日炎誰能戶外走霜
簟含清潤北窻高卧久心如止水澄物來隨所受漫云
苦煩歆靜觀暑何有

日昨策輕駟適從街市過見彼逐利者流汗肩相摩豈
不畏炎囂辛苦出無那歸來竹窻下月影含松蘿迴念
市廛人塵境甘消磨九夏尚如此三冬當若何

輕舟泛晚湖一棹煙波綠荷芰襲衣香鵲鵲傍人浴天
地一畫圖俯仰供清矚何必蓬萊洲雲霞覓仙躅黃昏
蛙鼓鳴還似雲山曲

我聞古人語詩以道性情題韻隨手拈易如翻手成乃
有追琢者格律嚴為程挺字苦幽澁結響務鉤鏗情性

轉拘迫未得天趣并廣厦避煩暑心閒塵境清即事據
別裁得句還獨賡譬彼蒼松枝風来自在鳴

燕引雛

營巢屋梁頭抱卵雛兒長捕蟲飼其饑雙燕心悵快羣
雛長大巢居難離褊弱翅凌風單引飛庭院愁欲墮願
借已力為羽翰嗟汝老燕胡不悟謾教飛來又飛去羽
翼成時會遠颺可似烏鴉能反哺

食蓮

平湖參錯芙蓉紫看罷蓮花食蓮子輕舟棹入碧洲灣
猶有新紅纔出水出水新紅未吐花晚風輕度香雲霞
幾回流賞冷衣袂蚤秋消息知非賒笑對水盤珠玉淨
清芬恰與幽懷稱莫教入口嫌苦心從識生成有本性

擬古七首

離離山頭花青青牆上草天天松下桃芄芃阪田稻雨
露苟不及指日成枯槁空谷有佳人幽閒而靜好憶昔
出門時蛾眉未曾掃日夕侍舅姑小心奉粟棗夫君久

不見出身事君早只戀洛陽花不返洛陽道日暮掩柴扉
脈脈空房老

露蟬掛高樹聲入西北樓晚景可憐生傷心樓上頭羅衣
掩秋扇風度寒颼颼伊人天一方遠戍并涼州家居有如此
冰雪況遲留深悔失斟酌却令覓封侯

織成鴛鴦錦裁成鴛鴦被鴛鴦本同心同生亦同死嗟哉
末世人其心不如此朝愛芳草青暮憐野花紫野花得意時
芳草正委靡

堂堂復堂堂義和何奔忙三日不見君見君髮半蒼五
日別故人故人天一方世事如飄蓬聚散那有常中庭
羅酒漿烹豚剖肥羊滿酌金屈卮笙簫奏兩旁勸君且
飲酒莫負好時光

天地一逆旅光陰乃過客如何百年中更促駒過隙勞
勞長安道役役洛陽陌車馬爭春風管絃擁上席但見
庭中花那見路旁柏柏樹日以老落葉無人掃朝夕收
兒來拋磚擊神道

冬至羣芳歇松柏乃青青衆人賞後凋松柏轉傷情傷
情亦何為見賞歲寒時歲寒不可回良材將安施不如
同枯槁免使獨樹奇君子苟相顧莫信桃李姿

玉繩橫長夜斗柄向西指寒風拂象牀爽氣生蘭阨美
人傷獨處拜月更衣起去年月圓時良人同妾視今年
月滿時出門求金紫金紫亦難求得之何足喜不如早
言歸與君長共此

馬賁牧牛圖

平川苜蓿含煙綠牧童羣集雲山曲烏犍遠放晚風涼
偷閒笑語相徵逐但願禾稼如雲收足供租賦免賣牛
安得太守如龔遂腰間樂勸解吳鉤夕陽在山尋歸路
煙氣濛濛暗林樹河中一幅景物繁監門圖繪意畧具

中樞歌

秉鉞託干城坐謀稱媼相奏對百官前供奉金華上諛
詞飾進報功勲中樞威燄天下聞健兒自衛弱攻戰董
兵權重唐監軍嗚呼徽宗猶不悟自恃可用唯宦豎草

竊雖平內寺橫坐令宋室成南渡

青青水中蒲三首

青青水中蒲如劍森池沼下有雙鴛鴦同生亦同老
青青水中蒲間以芙蓉花自問無顏色相對重咨嗟
青青水中蒲忽萎秋風裏終始不離波嗟君不似此

鴈奴謠

臨秋霜信排空書雌雄一失為衆奴飛隨天際不敢後
為恐羣鴈相招呼蘆荻蕭蕭白花亞成羣分偶眠秋夜

寄語彎弓羨少年當時何不連雙射

丹青樹

終南有佳樹其名曰丹青孤幹挺百尺上結車蓋形青
赤葉相間望若錦繡明崔黃好手筆一一畫難成抽條
應春和呈祥藉地靈鳥雀不敢巢映日獨蔥菁梁棟未
試用徒傳奇樹名不如松杉質猶足架軒楹良材苟終
棄空勞造化生

度竹鐘聲

月窗清映檀欒影細吟輕籟孤梢靜蕭疎透響送霜鐘
招提何處山僧醒韻雜琅玕度綺寮點滴寒更發深省
玉露頻敲浙瀝微斷續如傳青籥冷今宵參破耳根禪
乍迴殘夢清懷永

古別離

古別離天上牽牛織女星一年一見徒含悲銀河清淺
欲度難何況白槐虧蔽之人間有怨婦七夕夜半鳴鳴
啼空抱心事不得訴仰窺雙星欲寄詞鵲橋歲一駕猶

有交會期那似良人戍隴上生去未必生還歸

唐寅秋林高士圖

寒溪引入仙鄉深一川風景含秋林霞衣雲帔結知心
徘徊稱意羞華簪或浮輕舸或卧岑把釣蘆岬垂絲沈
有來童子斜抱琴高山流水彈清音拏空松柏虬龍吟
白鷗為伴浮碧潯商山遺跡復見今簌簌晚籟寒窻侵
生綃一幅重南金唐君妙筆何森森乘槎他日擬追尋
祇今卧游瀟湘滌煩襟

新月

七月哉生明露坐寥天濶碧梧影漸稀清映蛾眉月古
鏡吐微芒銀鈎光出沒况當早秋夕素娥逾皎潔對此
新光流逸想隨時發盈虧始何年照耀無休歇古來對
月人胡為流波忽際茲玉輪生甯懷正清越無須秉燭
遊何用上探窟對月不暢吟轉瞬三五闕

七夕詞

孤桐泣露闌干濕絳河迢遞離懷急雙星契濶動經年

寶婺生塵掩雲笈歡娛却被離恨牽天鷄喚曙良宵殘
誰家弱婦高樓上何處金針玉指穿弱婦穿鍼羣乞巧
那知箇裏光陰老萬里遠戍祁連城十年不返長安道
長安月夜臨風歎空羨雙星渡銀漢龍輶旋轡鵲橋收
天上人間腸共斷

弋鴈篇

三秋月如水風雜喧菰蒲羣鴈自北至飛飛集平湖穩
向沙汀宿夢與秋波俱誰與弋鴈者巧計奚澤虞潛身

葦岬側持燈照鴈奴鴈奴嗷嗷叫羣鴈驚眠初避射各
分飛旋顧矰繳無無端迴幽夢共疾鴈奴誣喙啄更爪
擊忍辱聲鳴鳴雌雄各安眠孤身痛始蘇弋者還復來
噤口不敢呼隨意恣弋取滿載尋歸途我聞傳此事把
筆長嗟吁嗟吁意何為覽古興懷紆諫官君耳目讒者
百計圖一朝誅斥盡旋亦亡其軀干剗周代殷員沈越
滅吳自閉其耳目古今嗤至愚嗚呼興亡事視此竟何
殊

見桃下栽松感而有作

園中種樹羣芳滋幾年榮長紛歲蕤或列山側或傍池
同蒙雨露爭參差阿誰位置失其宜山桃下植青松枝
蜿蜒未放拏空竒甘為翁蔽嗟何辭春日抽條綠葉披
勢高獨占陽和私葱龍待到歲寒遲吁哉已過煦嫗時
我欲借問場圃師種植顛倒意何為青松磊落龍鳳儀
山桃弱質人所嗤胡居松上茂蔭垂因循坐令虬枝萎
自古掄材還若茲坐對感慨抒幽思安得索駝妙手移

或棄山桃付芟夷良材俾沐三春曦他年梁棟誠堪期
饑鶴行

松陰顧步霜翎拂徘徊本是山林物秋澄鏡浦魚深潛
饑腸獨立金風疾雲間萬里青田遙雙翅新剪難冲霄
主人稻粱思未報仰喉長空天沈寥

羽林執戟郎

香衢走馬雄風生蹴踘場開連夾城朝遊玉埒春如畫
夜醉青樓酒似渾青樓留宿金貂脫拚却一生花底活

野老吞聲哭忍饑餓
今執戟黃金闥

御製樂善堂全集定本卷二十

欽定四庫全書

御製樂善堂全集定本卷二十一

古體詩

題劉松年武夷九曲圖憶聞之蔡先生

武夷層巘嵐煙碧水墅山村變朝夕桃源祇許一舟通
就中疑有神仙跡聞之先生八閩客為余曾說山川僻
當時興寄玉筍峰嗟吁道阻未尋屐唐筆墨超凡格
半幅霜綃圖咫尺題詩九曲足卧遊還似書窻話疇昔

少年行

邯鄲美少年平生好仗義
白日佩劍出里門一聲叱咤
千人避捨身只為意氣投
生憎富貴誇交遊為君復
望君報千杯一醉酒家樓

雨

夜窻響芭蕉曉荷亞洲渚
誰知夢覺中一枕新秋雨
牀頭蠟屐閒起走繞廊柱
葛衫不禁風微涼添幾許

同五弟月夜舟歸

湖波瀲灩當秋澄一輪寒浸秋月明上下清光星斗燦
輕舸打槳中流行萬籟闌寂天在水蘆葦點點飛流螢
長空沈寥堪妙會鴈行拈韻欣同賡詩成泊岸松窻卧
還聽沿階蟋蟀鳴

遠將歸

欲別恨時促將歸恨日長庭前繫馬雙垂楊為君再整
羅衣裳去時路即歸來路別後新歡應勝故記得曾攀
弱柳枝即今瀟灑成枯樹今宵夢不到天涯垂垂銀燭

初成花欲訴離愁猶未了一聲雞喚東方曉

城門歌

城門閉兮言路開羣驚鐵騎燕山來城門開兮言路閉
處堂燕雀欣得計同盟已悞復和親坐令汴水成灰塵
小舟黎陽渡五日却笑南朝無一人君不見當時首禍
由童貫纔見邊烽先鼠竄

廢宅行

蛛絲密織珊瑚箔銅扉雙敞堪羅雀花開寒砌為誰妍

鳥啄風箏珠玉落當年甲第禁人窺此日塵生秘閣帷
繚垣欹倒村童入折取庭前丹桂枝老翁驚視傷衷曲
憶種茆檐領芳馥薰人勢燄強移栽曾拆儂家數間屋

蓼花風

秋潭徹底清岸蓼紅低映西風水面來娉婷舞腰競蒼
茫蘆葦花寂寞菱荷柄日落晚煙橫韻寫寒芳淨

有所思

置酒高堂上聽歌有所思所思在何處迢遞天之涯有

惠雙南金不如心相知南金用有盡相知無已時
眎彼中庭樹忽生連理枝連理非為貴所貴不相離
同心而契濶咄哉徒含悲

月夜蘆洲

似雪蘆花滿洲渚搖曳西風夜深語喚迴清夢水亭幽
秋色秋聲迷處所清光瀲灩月在江隱映漁舟過寒浦
雲臺歌

紫氣欲奪炎天赤南陽布衣提三尺昆陽一戰掃豺烽

洛中布治敷天澤攀龍附鳳為侯王二十八將名煌煌
中興功烈資贊襄雲臺圖貌千秋揚君不見淮陰蒞醢
英彭死子房從遊赤松子何似榮名保始終卓哉君臣
能濟美

除架

白露零場圃瑟瑟西風寒可憐含甲蔬生意忽摧殘垂
架青青葉引蔓已半乾呼僮為除治蕭然景物闌猶喜
遠山翠乍入踈窻觀無須感代謝漫愁乏盤餐冷畦旋

種韭會當凌霜攢

秋原草

迷離鋪翠露珠濕村郊寒颭西風急錦蹊繡阪憶春遊
秋光滿目扶筇立霜林葉落疊殷紅猶疑紫艷堆芳叢
寒雀成羣噪新霽平原晚景煙濛濛

漁舟唱晚

蕪葭戰夕風明霞入澄水罷釣盪漁舟欵乃波面起雲
山列遠屏坐卧鏡光裏孤蓬掛玉鉤濁醪宴妻子短笛

咽涼颼詎解調宮徵秋來景寂寥漁樂獨無比

秋浦泛舟

西風拂水煙波綠櫂過寒溪三四曲采采薰葭颭白花
臨流驚起雙鷗浴雙鷗忽入芰荷叢可憐寂寞餘殘紅
錦帆畫舫披薰風猶憶競渡誇天中轉眼秋湖明似鏡
雲山倒影澄波靜岸柳寥寥咽晚蟬艤舟月掛孤蓬正
高其佩指頭畫魚

玻璃幾頃孤煙橫修鱗數尾不辨名晴光蕩漾耀金碧

泳游波面依浮萍誰知瀟灑濠梁與付與一指傳其生
掛壁滄浪秋意渺彷彿當年在藻情

有初行

君不見晉武曾焚雉頭裘平吳還駕羊車遊又不見明
皇珠玉焚前殿太真寵盛長夜宴人心靡不有其初幾
見歷久常不渝當時焚寶博虛譽誰知欲熾翻焚軀漢
文却馬輕千里崇尚節儉輝青史不聞號令付炎官祇
覺中心淡如水

八月三日作

金烏纔西下歸鳥集疎林乍見中秋月弄影清池深徘徊倚石欄閒望杼清吟却憶去年秋今夕送知音

癸丑年八月

月三日平郡王奉命西征

邊陲渺天末颯沓霜風侵撫景懷契濶

躊躇思不禁南仲方出車頡利未生擒月明人盡望壯士秋思沉我方宴卧餘風景聊追尋夜深蛩語咽涼露濕衣襟

仲秋曲

銀壺滴滴更漏長
踈梧月影含秋光
夢迴幽枕蛩響切
曉看殘荷露氣涼
蓼花翻風亞洲渚
驚起賓鴻飛別浦
一聲孤唳碧天高
二十四絃調玉柱

夜聞覺生寺鐘

紗牖度涼颼
桐枝弄踈影
睡鴨篆紋消
一榻深宵冷
忽聞野寺鐘
十里傳音永
不知十方界
誰歟發深省

桑條韋

桑條韋繼斌媚娘
一朝封劍斬五王
後車仍蹈前車轍

可憐唐室多專房本為相憐更相倚誰知禍在椒房裏
神龍餽餅不可言總為龍裘欲加已嗚呼開創事亦難
太宗圖治頗英賢惜哉家法未盡美致令女禍相連綿

遊西海

輕舸盪入薰葭叢波澄西海連長空雲山倒影弄明媚
寂寞殘荷搖晚紅蕭齋習靜過三伏今日扁舟晚景逐
煙汀沙渚轉蒼茫却憶薰風吹岸綠

南苑雨中即景

蕭蕭綠槐枝，徹夜滴踈響。檐頭喚曉頻，野雀三與兩。閒
從閣道行，金風透颯爽。含潤草猶芊，凌寒菊初放。牆外
馬聲嘶，悠然動遐想。

雙柳樹

雙雙高柳拂長空，繁枝低亞相青蔥。不知植此者誰氏，
秋來踈葉凌西風。露浥平原獵騎出，得意誰知消歲日。
南苑徘徊雙鳥飛，煙柳蕭條僅存一。漫言草木本無情，
可憐獨樹傷無朋。寒郊彷彿靈和殿，月上空餘子影明。

海子外行圍

朝霧歛秋空遙天白如水獵騎出郭門寒郊行邈迤箭
逐雙雕飛鷹伺羣雉起相逢倚杖翁農話斜陽裏悠揚
墟里煙淡掛疎林紫歸鞍拂晚風獵罷心猶喜

鷹搏兔

風吹衰草寒颼颼蒼鷹在臂凝霜眸瞥然狡兔走平疇
三窟已失空含愁高盤雲翮孤星流厲爪下擊勢更遒
怒氣一奮誰能收嗟彼韓盧有技徒增羞嗚呼汝鷹性

匪柔却邀富室千金求
古來英鷲半埋沒
凡雀嘈沓何其稠

南紅門捕魚

煙蓼亞寒汀
澄波漾秋浦
垂綸玉鏡明
潛鱗堪指數
蕭然秋意深
數聲離岸櫓
漁笛橫西風
雲山入新譜

寄衣曲

夜涼漏永聲
瑟瑟征衣自裁還
自縫素絲牽恨紛難理
銀釭照淚闌干紅香闥
無那秋蕭索
頻憶龍堆朔風作

及時遙寄禦君寒只恐到遲君不著

瀚海石子歌

昔聞瀚海石子奇今日几席得玩之瀚海渺在天之涯
草不抽莖樹鮮枝春光罕照秋風悲長年那得雨露滋
其中產石羌誰為嗟彼從軍戍邊陲更過萬里無歸期
故人天末相贈貽開匣忽覩光離離遠寄用表長相思
紅如珊瑚碧琉璃硬黃深青各有差大如雞卵未剖時
小如釵上紛珠璣亦有奇峰異壑姿天然那事追琢施

感君贈我置雲帷
長日靜對心神怡
高歌消得梧月移
吁嗟故人知不知

濬沼

圓池寬數畝
秋水涵清虛
植以芰荷花
畜以文錦魚
歲月既云久
其下積泥淤
潑刺礙遊鱗
相忘憶江湖
物亦含其生
與人豈異趨
一朝深濬之
爰為安其居
快哉玉鏡中
潛躍隨所如
何殊濠濮上
撫景襟懷舒

題唐岱秋山不老手卷

唐生胸中有廬霍為余一寫秋山狀毫端氣韻擅蕭疎
邱壑縱橫出心匠遠峰螺髻翠欲滴飛龍直下噴銀浪
招提想像晚鐘鳴森列松杉作屏障我聞山水貴可居
卧遊亦足娛清曠展對蕭齋秋意深拂拂金風侵几上

賦得霜花撲曉韉

山路散晨光行人殘夢醒款段嘶寒風落月挂斜影空
林霏素霜萬壑朝嵐靜愛日晃征鞍點滴留清冷彷彿
踏春遊花落餘殘景

題李思訓寒江待渡圖

輕嵐淡抹西風肅，征人趁曉紛馳逐。
啞啞羣雀噪渡頭，漁舟猶伴殘燈宿。
千林紅蘂正凋殘，欲落未落古月寒。
勞勞名利何時歇，一幅寥蕭几上看。

風篁笙奏

明窻愛日多，几案光生暖檻外。
竹千竿翠影欣踈散，何來笙簧韻寥寥。
風送遠繁節乍敲鏗，低拍殊幽緩。
清如嘯，遇孫勝比咸撥阮。
漫云耳根驚天籟，三千湍。

雀噪

東方欲生明纖月西南落平林曙景通啞啞鳴寒雀霜
風斷續吹繁音轉高閣似話五更寒如語栖枝樂蕭晨
入聽幽明窻興堪託愛日已三竿暖影侵帷幕快哉黃
棉襖人鳥同時著

冬夜對月書懷

烏鵲棲穩人行少弗弗霜風窻外掃曲屏銀燭含幽光
獨愛侵帷玉蟾皎地鑪然炭暖氣徐俯仰丈室慚溫飽

此時緬想饑寒人茅屋欹歔愁未了境遇由來不可齊
消懷聊把陳篇考忽聽霜鐘送林杪踈櫺影度梅香悄
喜對清光延佇吟殘更欲盡雞啼曉

遊法海寺即景

纖月挂空林曙鴉帶寒影匹馬衝霜風為訪招提境村
墟散炊烟回首眄斜嶺扶桑耀朝暉寒谷添晴景我行
已覺疲禪僧坐方靜稍然石竈烟為我烹茗苦茗尋古斷
碑存探幽石徑永誰能問法源暫可息浮梗帝京佳氣

多烟火籠萬井却供眺遠閣一覽餘清省

寺有眺遠閣
晴明望帝京

尺如咫

法海寺題壁

百年蘭若雲封戶山僧靜坐絕往還
我來杖策尋幽勝
啾啾山鳥鳴空山欲落未落楓葉赤
乍斷乍續秋雲閒
烟蘿石徑歸路杳孤月已上臨禪關

冬夜讀韋詩

焚香對銀檠夜靜見明月遲遲玉漏寒
萬籟此時歇蘇

州五字詩披覽逸興發園客事獨繭格調殊清越七竅
總不鑿安排活潑潑終卷不能釋玉繩橫未幹

蠟珠謠

香篝斷續蘭烟吐月窻細把長更數銀檠明滅詩思遲
一天霜影簾垂戶誰敲仙掌鏗鏘鳴猶疑滿斛珠璣傾
却教吟興娛清夜窻外寒賡綠玉聲

村賽曲

老巫伐鼓聲鑿鑿冬醅初熟霜柑紅合家羅拜致虔恭

村村樂事傳幽風黍稌堆西稻堆東倉箱萬億快年豐
謝神默佑恩何窮賽罷福酒先酬翁老巫牽羊別家去
來年大有神應助

霜曉炊煙

村墟寒曙暉霜重烏啼少微辨炊烟橫旋向疎林繞縷
縷披風寒依依散晴曉晨粥想已成曳篆絲漸小長祝
茅簷裏歡然溫且飽

晉夫詞

上林虎圈當晨開六龍飛騎官家來苑尉小臣乏口給
諛諛獨顯嗇夫才霸陵漢帝稱仁厚特地褒嘉頒墨綬
若非採取釋之言坐令佞者羣奔走君不見正色立朝
周大夫廷議期不出口

鶴髦裘

翩翩鶴髦如披銀望之直是仙中人可憐落魄離邊者
中心歆羨良艱屯君不見仙人不住人間世瀛洲方丈
誰能濟長安比戶豪富家朝坐華堂暮空第吁嗟仙人

不若此豈如垂釣披裘學嚴子

草色

勾芒鼓吹招搖東羲和御日騎蒼龍暖雲晴旭當天烘
皇州十里輝春融女夷小試龍梭慢春信遲遲歸別院
繁紅猶未上瓊枝嫩黃乍覺鋪芳甸光風轉蕙物昭蘇
暗報陽和日日殊輕寒料峭天街曉試辨茸茸色有無
萍始生

潑刺遊鱗纔上水嫩萍拖翠春流始牽風搖漾縠紋輕

試詰生生忘所以綠髮新梳濕未乾半含清潤凌波寒
誰家一匹水紈素忽織參差藻無數

石徑松雲

石洞盤紆雲掩門長松落落拏雲根虬枝颯沓泛清籟
幽勝不數桃花源綠陰掩映蒼苔翠仙家孤鶴偷閒睡
醒來雲氣忽滿身疑是丹爐烟繞翅

漁莊晚霽

夕陽天外明遠浦歸颿疾吳童盼阿儂獨倚柴門日晚

烟漾澄流漁莊足蕭瑟何來欸乃曲忽自叢蘆出霽影
射波紅曬網棧皮室共擬金波上數杯醉椰蜜

野寺殘陽

斜日照林低野寺鐘魚靜亭亭塔影孤川風淡晚景片
雲出岫間餘霞橫抹嶺誰歟牛背人歸路歌聲永暮色
遠蒼茫金波忽流影山僧獨趺跏炷香觀平等

野店風帘

杏花村裏春光好人家的隱映迴巒抱招得遊人策蹇來

一尺青帘挂林表輕風搖曳高復低斜拂垂楊綠未齊
曉烟冪歷溶溶月夕籟低徊淡淡溪東皇鼓物標青幟
臨風無限悠揚意韶華撩眼興陶然不緣野店新醪醉

過覺生禪房

十里輕陰路便覺非塵境緩轡到招提颯然松風靜禪
房花木香小憩耽清景上人息萬緣跏坐觀平等徘徊
石徑紆徙倚松軒永且喫趙州茶莫問雲門餅歸騎漫
教催餘霞亘西嶺

御製樂善堂全集定本卷二十一

欽定四庫全書

御製樂善堂全集定本卷二十二

古體詩

熏香謠

寶鴨昂頭綠雲吐湘簾幾扇垂當戶
廣座風生六月涼
水沉一片熏爐炷熏爐
斐几清無埃芝印欲就光徘徊
誰家才子紅蘭署何處佳人玉鏡臺
篆絲細裊香烟散
萬境都來參鼻觀主人日午正高眠
夢中留得殘香伴

漁鄉曝網

殘陽西落射柴扉
漁翁盪漿前溪歸
歸來枯柳扁舟繫
長竿曝網溪風微
風吹網眼千珠落
網得魚歸兜共索
老翁不與意非慳
換取青錢供晚酌
江鄉有酒更有魚
一家長享豐年樂
豐年樂雨後明霞抹林脚

松陰午憩

長松夏亦寒
嘉蔭如張蓋
白石堪坐卧
清泉流一派
有時微風起
瑟瑟泛虛籟
繫余閒步屨
小憩松陰內
枕簟

延清芬濤聲涼可愛徒倚林泉間興寄雲霞外

溫泉荷花

首夏荷葉纔田田溫泉開花已如然六月池塘荷始盛
溫泉花謝餘青柄溫泉水暖荷花早羣驚艷質凌波好
那知消長不須時九夏未半先枯槁我欲乘興弄扁舟
薰葭青青壓岸頭可憐荷花轉不若已作一段橫塘秋

聞雞起舞曲

聞雞鳴中夜舞英雄志氣冲天宇聞雞鳴舞且歌功業

未就可若何古來壯士多消磨待旦不寐空枕戈君不
見士雅擊楫意慷慨越石清嘯胡兵退當年事蹟略相
同恨不功成青史載

題林朝錯蒼松霜隼圖

長松落落拏龍虬下映清淺之碧流何來霜隼脫羈鞵
高枝獨立態轉遒搏風羽翮橫九秋電光閃閃輝雙眸
挂壁直使燕雀愁啣泥怯上雕梁頭君不見將軍臂上
軒勇氣饑飽由來受人制又不見王孫愛汝雪毛奇高

飛不得遭縛繫豈如幻化生綃裏厲爪秋空攫飛雉五
方小兒謾張羅因風直欲凌雲起

六月十四日聞蛩

今年秋信早六月蛩已鳴月檻納涼天籟寂唧唧忽作
三兩聲主人哦句繞徑行砌旁幽韻如共賡幾度振羽
音逾亮轉動經年離別情仰看踈梧魄影明銀河如練
碧落橫葛衾生寒羅幕靜秋聲秋色今宵并

卧月

新月挂玉鉤，露下空庭濕。高懸綠湘簾，盡放清光入。桃
笙漪翠浪，桐風來習習。獨卧看流螢，千點星光集。

題趙文敏中峰懷淨土詩畫卷

了得心如幻，西天即東土。多少念佛人，覓佛在言語。妙
哉松雪翁，筆意脫凡腐。借問是佛非，燈籠答露柱。

陌上桑

離離陌上桑，桑葉初染綠。郎在姑蘇城，妾在大隄曲。相
隔迢迢如萬里，大隄秋冷芙蓉紫。風光春去復秋來，可

憐郎心不可恃郎心風中燭妾志水中石願作白馬逐
君行天宇寥寥覓無跡

封鮓行

曾聞陸氏子懷橘餉其親又聞陶氏母封鮓謹持身懷
橘可云孝封鮓可云仁兜豈無母遺官物非濟貧卓哉
陶士行其後為顯臣運甕久習勞分陰常所珍教子以
義方湛氏真其倫

疾風勁草

金風颯沓至羣卉皆委靡豈無芳華姿時過不堪恃矯
矯彼勁草特立秋原裏枝葉已蕭條堅心猶未死迴顧
羣卉悲非甘衆所奇春和苟回煦願共芳菲時

七夕篇

白月皎皎欲上弦西風送爽侵帷筵秋聲秋色相婉孌
撫景策杖庭梧前迢迢碧落橫銀漢此夕雙星得相見
脈脈盈盈一水間經年話別情何限桂宮雲帳罷龍梭
羽蓋初嚴欲渡河天下人間兩無異惟有今宵秋思多

秋思綿綿亘今古離愁渺渺迷處所可憐羅幔暗驚秋
不比尋常乞巧樓誰家砧杵傷獨宿何處邊笳淚欲流
邊笳砧杵斷復續恨比蛛絲縈萬曲仙人掌上露華寒
曝衣樓畔金颺肅天雞唱曙各東西榆影茫茫路更迷
可知此夕雙星會便是當年古別離

古風

矗矗山頭峰忽為山下道汎汎水中萍倏作原上草何
異人間世夢幻頻顛倒朱墨分貴賤彭殤齊壽夭萬境

何縈心瀟灑舒懷抱池水淡以深一泓秋月皎

暮出城東門見彼耘田者偃僂畦壠間紅日正西下揮
汗立片時薰風散平野指日卜西成篝車賽秋社還憂
租稅重催迫不相假終歲事辛勤農夫獲利寡

黃金鏤為鈿明珠飾為珥裊裊瘦腰肢若不勝羅綺佳
人命多蹇嫁與薄情子勸君覓封侯出門求金紫雖去
萬里遙脉脉甘守此朝遊花陌間暮宿青樓裏終老迄
無成妾身安所恃

有客天一方遺我尺幅書開緘肅起拜如獲雙明珠還
君以空函非緣友道疏相思在裏曲覩縷不能抒

明月照高樓上有窈窕人秋風冷蕙帶舞袖欲生塵腸
斷望斑驢心灰憶錦鱗疊我鴛鴦被收我芙蓉茵相思
隔萬里羅帳為誰春

獨樹少嘉蔭兩樹陰扶疎彼此相託藉春風擺葉初龍
蔥森天宇綠影含綺疏雨露豈有私生理頗自殊忽然
萎其一孤立等無徒草木尚如此交情慎莫渝

秋風西北來庭砌涼以清玉魄映疎梧唧唧寒蛩鳴雙
星在河漢新傷離別情誰家砧杵動良人方遠征而我
晏然卧涼颼拂畫楹殘夢迴枕簟吟哦月影明

細柳營行

壁壘傳呼天子來將軍無令門不開介冑不拜識軍志
棘門灞上真兒戲君不見淮陰多多稱益善漢王夜入
恣調遣從知持重勝多謀亞夫名望從茲顯掃平六國
智不淺

折檻行

建章殿上垂龍裘槐里小令面請求願斷佞臣一人頭
佞臣為誰安昌侯觸犯天威攀殿檻拋將血性塗肝膽
免冠叩首老將軍却令遺直出屯坎嚴威忽霽迴春暄
令勿完葺留斷痕徒教事後旌忠直何如聽取當時言

寄衣曲

絳河西亘天欲秋聲聲砧杵雜風流誰家少婦傷離別
并剪裁衣明月樓新棉絮罷開香笈手把金針燈下泣

舊衣棉少不禁寒
新衣棉多線縫澁
線縫澁衣寄遲夢
中識得龍堆遠
衣到愁過汧凍時

詠塞上達蘭海蘭松木筆格

迢遙絕塞隔萬里
其間乃產海蘭松
虬枝勁直傲霜雪
盤盤偃蓋蒼翠濃
故人戍回言其畧
懸知風景邊壤同
開笈更贈我筆格
云即此木已所攻
視之脉理頗密緻
內黃外白如兩重
磨礪光澤全天巧
素莖幻出幽蘭崇
背上題字選名句
疑鏤玉葉鐫青銅
吁嗟沙漠所生物

何期得伴書齋中
韵助揮毫楊柳月
秀生覓句梧桐風
芸窗宛覺添芬馥
研山更似增玲瓏
感君雅意恣吟玩
良材樸斲思無窮

觀刈

秋露零場圃
金風氣蕭索
百穀已告成
呼童庖錢鏹
為地只盈畝
頗可驗耕鑿
屆茲西成候
策杖課收穫
轉憶東作時
雨暘卜時若
入夏秀以實
日中驅鳥雀
念此終歲勤
亦得一朝樂
園林喜空明
爽氣侵簾箔
撫景獨吟

哦允矣興所託

月夜泛舟

西山斜照秋江暮東林乍湧銀蟾露隊隊歸鴉噪樹烟
一葉扁舟凌晚渡風閃冰輪縷縷光波含玉鏡如如去
長天一色望欲迷點點疎星堪計數髣髴河漢坐乘槎
白榆茫茫夾兩路秋景寥蕭已可人更兼秋月明寒素
便卧蘆花任所之何須更問歸來處

招鶴行

主人招鶴鶴不來雲中洒翮空徘徊徘徊有語不得訴
一聲長唳告鶴媒翁家白石間蒼苔林園勝絕無塵埃
飲啄更喜稻粱足翺翔無復駕鶯猜淡沲清池供暮浴
迷離曉岬衝烟開絕異華亭怨明月不殊瀛海棲瑤臺
吁嗟不返胡為哉臞骨自知與世乖主人雖容奴僕恨
不如小鳳巧語諧珍重深恩從此去煙嶠茫茫不知處

秋江曲送梁學士假歸省親

秋江月印秋水明行人弄棹江上行帆指錢塘促離恨

雁來北塞多淒聲淒聲離恨何時已只為高堂念遊子
從知計日賦歸來繞膝承顏無限喜秋江岼颭蘆花
故鄉風物依然嘉慈親早慰門閭望再謁金門捲絳紗

慕容垂

慕容奇男子低頭初入鄴馬上歌丁零得預陰山獵高
繫白鼻騮共醉燕姬家燕山不知處健馬如飛去莫怪
王景畧封劍用詭計早知未遂時已有虎狼志

放燈曲

中宵弄槩蘆荻洲幻成萬朶金蓮稠涼露涓涓月華白
澄波幾頃連天碧詩思因秋一快哉放燈滿湖歸去來

待月

銀河流素寒宵永簷牙挂樹疎無影石欄徙倚望金波
時有金風送微冷瓊樓半開天際紅香熏睡鴨沉烟濃
繡屏十二秋無色頻聽階前細語蛩蛩音留客為久立
寥空露重衣衫濕

秋日泛舟西海

金颶漾蘭渚霞光射明川兩岼荻蘆花中流獨放船水
氣含微冷棹破秋湖烟一派空明景與我相周旋憶我
臨薰風輕舸弄清漣彈指九夏過秋水連長天擊楫暢
吟懷驚起橫塘前

題朱貞女傳

卓哉朱氏賢女子柏舟矢志志不徙蔡公獨展大手筆
質言傳紀書盈紙窈窕少長相公家笄年禮聘許適李
李未昏姻中道捐女乃慟哭爺前跪免已命字不可移

兒未成婦不可死權衡生死兩塗間兒惟自盡兒心耳
江頭秋冷水無波市中火煽房不燬貞心幸托蔡公傳
傳存人亦歸蒿里伊余耳聞此事熟幾年宛轉詩腸裏
今朝檢傳作題詞題成凜凜秋風起

鶴唳行

長松落落經千歲下有孤鶴石邊睡睡醒臨風唳一聲
聲中無限幽憂思欲上松梢卧月明可憐剪却雙飛翅
主人稻梁豈易餐獨步青莎不得意漫誇衛國乘華軒

空傳瑤島陪鸞馭爭如野鶴不受羈飛止由心無箇事

鳴鴈行

洞庭葉落寒林空雁行斷續鳴金風烟波浩渺望無極
好共銜蘆明月中流黃弱婦起長嘆銀河皎皎夜將半
可憐鴻鴈尚知歸郎似斷蓬何處飛

奕

長夜苦無眠銀檠燈花落丁東漏聲寒風響歲蕤鑰消
遣憑何物楸枰差可樂布子定規模就勢覘強弱棄取

大小間幾許費忖度何須分勝負妙理應思索試從奕
罷看本來無一著

金籠鸚鵡曲

芙蓉小苑曲欄東綠衣深貯黃金籠春來景色潑眼濃
杏花微雨紅濛濛翠毛丹味饒佳麗獨傍果思剪雙翅
主家歌舞按涼州每聞入破垂珠淚稻粱飽飫金籠裏
不如饑飲壠頭水

秋日過廣通寺

鳴鞭御街過小憇招提境瀟灑松竹秋因風弄清影咫尺紅塵中便是山林景欲去夕陽西颯然衣袂冷

西山下故宮曲

蕭晨策馬西山足嵐氣纔分萬峰綠颯沓霜風冷野橋
霏微露氣搖寒竹野橋寒竹接宮牆何年帝子黃金堂
苔鎖雙扉人不見空餘寂寞山花香當時綠鬢承歡處
燕巢蛇穴迷煙霧金牀文綵已成塵井欄想像梧桐樹
華清宮殿絕鳴鑾建章萬戶圖中看徘徊追賦前朝事

蘇篆題碑字未殘

瀛洲亭

木天儲羣彥古蹟留芳馨
咫尺樹石間舊結瀛洲亭
清風振瑤席花影落階庭
渺茫弱水遙荒唐白玉京
誰知通仙籍不隔水盈盈
院松四特色天籟萬古聲
成器皆琳瑯裁詩或瑤璫
寄語亭中客莫負登仙名

明窻秋影

秋日上窻窻紙明閒庭梧竹紛縱橫
扶踈更復含涼籟

為我乍作蕭騷聲霜林敗葉如染紫遙漏螺峰淨初洗
引入文疏弄影枝倍添一段秋光美

驄馬御史歌

行且止避御史官道開驄馬來驄馬御史真雄才令行
無阻厲風雷五日京兆誠惜哉民擁處驄馬去君不見
鈎黨袖起玉石焚一時清流羣避路

江臯曲

蘭洲漱灩春波綠十里橫塘曲復曲歡跨青驄上大堤

妾在吳船夜獨宿船頭恰見冶遊郎立馬贈我黃金璫
還君金璫君莫惱不作錢塘蘇小小

秋日同二十四叔父五弟遊玉泉諸名勝即事誌
興用爽氣澄蘭沼秋香動桂林為韻十首

秋光淡空碧蕭蕭天地朗今日勝遊招雙槳扁舟放倒
影鴻鴈寒澄翠玻璃廣殘香度荷風颯然襟袖爽

輕舸泝遙波荻岬蒼茫意眼界淡烟光心宇澄秋氣便
狎鷗鷺羣詎羨笙歌沸舊遊境頗諳茲遊足清味

我聞好事者萬里勞攀登咫尺苟會心邱壑咸可憑
草枯石岸出霜落溪光澄泊舟古寺邊欲覓淨名僧

漁村互掩映遙矚凭闌干三秋稻已熟空畦野水寒
繁艷萎堤花幽香刺澗蘭最喜螺峰青不隨時序殘

層臺接曲阿梵宇凌霞曉紅舒野蓼花翠點殘蓮
沼川泳而雲飛無心適魚鳥觸景樂相忘如遊寥廓表

蕭晨步名園况復值高秋晴旭隔林上天宇嵐煙收
長空淨如洗爽氣澄雙眸坐看衆木末如登百尺樓

西風搖梧竹冷然泛笙簧石梁古月明華池淡冷光已
見薰葭白漫憶荷菱香妙哉嵇中散高懷一嘯長

雲日掩映間遙峰乍清聳霜染槲葉丹臨風枝亂動野
鶴唳高空忽被閒雲擁我亦棹歸舟明湖泛瀕洞


書帷捲午晴小山賦叢桂衣袂足清涼雲山復開霽故
知素節佳況是神仙地即景暢襟抱陽烏已西逝

涼風起天末落照掛疎林栖鴉噪樹杪寒烟濕衣襟勝
遊那可戀逍遙本無心歸來坐明月蒼然暮色深

題趙孟頫洗馬圖

平郊拖邐迤一川寒且泚怪石刺波青櫨林紅間紫奚
官驅天閑盡就明波洗酡顏斜坐鞍奚童任指使計數
約百千量材皆駉駉名駒志氣殊好境亦知喜或馳若
龍飛或靜若鴻止並驅爭先後滾地烟塵起或牡求其
牝或母乳其子亦有獨立者昂昂鬃上指駿馳千里遙
怒破萬軍壘我聞李伯時畫馬夙擅美雪翁傳宗派妙
意得神髓如遊汾漢間似歷渥洼裏是時金風奏郊外

秋蒐始擬欲試金鞭一箭落雙雉



御製樂善堂全集定本卷二十二